



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

R. Angliae Regi Illvstri.

**urn:nbn:de:hbz:466:1-20006**

sona idonea faciendam, sublato cujuslibet contradictionis & appellationis obstaculo, procedatis. Nos enim dilectis filiis Corbeien. & de Hersued. Abbatibus & Decano Paderbornen. dedimus in mandatis, ut postquam ad electionem juxta mandatum apost. processeritis, vel si jam forsitan processistis, ipsi tam formam electionis quam personam electi diligenter examinent, & si eam canonicè & de persona idonea invenerint celebratam, ipsam sublato appellationis obstaculo auctoritate nostra non differant confirmare; laicis sub pœna excommunicationis firmiter inhibentes, ne amplius quam consensum debitum in electione præsumant aliquatenus usurpare. Eisdem etiam firmiter auctoritate nostra præcipimus, ut prædictum quondam Episcopum per distinctionem ecclesiasticam compellant quòd bona Hildesemen. Ecclesiæ, quæ per ipsum sunt impedita, non differat expedire, & tam vos quam Ecclesiam vestram ab ipsius & fautorum suorum gravamine tueantur. Provideatis autem ut taliter quæ mandamus curetis effectui mancipare, quòd non videamini mandati apostolici contemptores, & de inobedientia, per quam fuit primus casus hominis procuratus, argui non possitis. Datum Laterani II. Nonas Maij.

*CORBEIEN. ET DE HERSUED. Abbatibus, & Decano Paderbornensi.*

**C**vm in negociis &c. *ferè in eundem modum ut supra usque ad verbum gravamine tueri curetis.* Nullis literis veritati & justitiæ &c. Quòd si omnes &c. duo vestrum &c. Datum ut supra.

*CI. LVBVSSEN. EPISCOPO.*

**R**eferente dilecto filio fratre B. Hospitalario, nostro est apostolatu referatum quòd cum à tempore juventutis suæ secundum institutiones Canonico-regularium Arrouvasien. Ecclesiæ beati Augustini regulam professus fuisset, & in ea ultra decennium permanens, sacros ordines usque ad sacerdotium suscepisset, juventute postmodum impellente, curiositate potius quam religionis amore devictus, terram Hierosolymitan. & alias videre desiderans, ab Abbate suo non tam voluntariam sub eadem conditione licentiam obtinuit quam extortam ut si bonæ me. Alexandrum Papam prædecessorem nostrum inveniret in via,

causam itineris sibi exponeret, & juxta mandatum ejus vel procederet, vel rediret. Verum ipse neglecta conditione procedens, suscepit habitum Hospitalis, in cujus servitio usque ad hæc tempora fideliter laboravit. Sed cum ordo præmissus districtioris sit observantiæ quam secundus, prudenter attendens quòd de laxiore ascendendum sit ad ordinem arctiorem, non autem de arctiore ad laxiorem sit ratione aliqua descendendum, ad se Domino inspirante reversus, ad bonum redire desiderat quod dimisit. Cum itaque non mediocriter erret qui minus bonum majori bono præponit, fraternitati tuæ per apost. scripta mandamus quatenus inquisita super præmissis diligentius veritate, si rem inveneris ita esse, præfato fratri B. licentiam auctoritate apostolica præbeas ad primum ordinem redeundi. Datum Laterani VIII. Idus Maij.

*R. ANGLIÆ REGI ILLUSTR.*

**A**postolica sedes univerforum Christi fidelium mater & magistra non ab homine sed à Deo potius constituta, tunc veræ matris affectum & magisterij redolet disciplinam, cum ad benignitatem gratiæ diligit filios, & discipulos ad justitiæ dirigit æquitatem. Non enim potest vel dissimulare matrem, vel magisterium qualibet occasione negligere, quæ à Domino in signum dilectionis oves dominicas pascendas in beato Petro recipit, & ligandi & solvendi ab eodem & in eodem obtinuit potestatem. Ad id autem juxta pastoralis officij debitum exequendum circa nostræ promotionis initia regia serenitas per literas, quas penes nos in tuæ serenitatis testimonium referimus, efficaciter nos induxit, dum ut benignè tractaremus subditos, & in causis sine personarum acceptione procedere curarem, nec declinantes ad dextram nec ad sinistram, per easdem literas & consuluit salubriter & humiliter postulavit, addens quòd sic possemus cervices sublimium & superbiorum colla calcare. Et pastoralis igitur officij sollicitudine provocati, & regalis consilij continentiam recolentes, venerabili fratri nostro G. Eboracen. Archiepiscopo ad sedem apostolicam recurrenti nec volumus nec debuimus audientiam vel justitiam denegare. Conquerebatur enim se per magnificentiam tuam temporali-

*Epist. 17. Quòd restituit bona Archiepiscopo Eboracensi, & permittat ipsum administrationis officium libere exercere. Vide Roger. de Houeden. ad an. 1198. fol. 446. edit. Londin.*

*Epist. 15. De eodem arguente.*

*Epist. 16. Ex laxiori ordine monastico ad arctiorem transire licet, non contra.*



bus sui archiepiscopatus redditibus destitutum, & quod longo fuerat afflictus exilio, & in injuriam totius Cleri mendicare coactus, supplex & humilis proponebat. Volentes itaque ipsum tanquam fratrem nostrum & Ecclesie filium diligere ad gratiam, & te tanquam catholicum Principem & apostolicæ sedis filium specialem ad justitiam dirigere conservandam, immo directum potius exhortari, cum in contemptum ejus cujus existit minister, & apostolicæ sedis injuriam, quæ ipsum in partem sollicitudinis evocavit, & tuam etiam (ut prosequamur verum) verecundiam, cujus est frater, redundet ministrum Dei sollicitudinis nostræ confortem & regali stirpe progenitum mendicare, serenitatem regiam omni qua possumus affectione rogandam duximus & monendam quatenus tam nos quam te ipsum ab hujus onere difficultatis absolvas, & à labiis liberes detractorum, qui non solum quæ perperam attentantur ad detractionem assument, sed etiam secundum Prophetam exacerunt ut gladium linguas suas, tenderunt arcum rem amaram, ut sagittent innoxios in occultis. Attendas igitur quanta nos infamia, quanta te detraçtio sequeretur, si vel justa petitio exulis non introiret in aures nostras, vel te fratris exilium non moveret, & eundem Archiepiscopum ob reverentiam apostolicæ sedis, quæ te tanquam filium diligit specialem, & in hoc & majoribus de celsitudinis tuæ sinceritate confidit, in plenitudinem gratiæ regalis admittas, & diligas sicut fratrem, & velut Christi ministrum honores: ut in uno eodemque negotio Deum tibi reddas propitium, consulas apostolicæ sedis honori, tuæ salutis provideas, & fratri subvenias exulanti. Memor esto salubris consilij quod nobis per tuas literas (ut diximus) præbuiisti; & dum secundum illud nos agere recognoscis, quod agimus approbes, & regaliter exequaris, ne qui nos justè in omnibus procedere suggessisti, secundum justitiam agentibus te opponas, sed taliter ad exhortationem nostram cures cum eodem Archiepiscopo convenire quod jura ejus auferre vel minuere minime videaris & ipse contra suam & Ecclesie non veniat honestatem. Ad id autem laudabilius & celerius exequendum venerab. fratrem nostrum Rothomagen. Archiepiscopum & dilectum filium Ab-

batem de Persagnia, de quorum discretionem plenè confidimus, duximus deputandos, qui honestum modum pacis inveniant, & eundem Archiepiscopum regiæ benevolentia reconciliare studeant, & in tuæ serenitatis devotione ac obsequio solidare. Quod si fortè (quod absit) per eos tractatus pacis juxta votum nostrum & desiderium non poterit consummari, eundem Archiepiscopum ad temporalia restituere non omittas, nec impediās quò minus in spiritalibus creditæ sibi dispensationis officium exequatur, sciturus nos dilecto filio P. sanctæ Mariæ in via lata Diacono Cardinali, apostolicæ sedis Legato, dedisse firmiter in mandatis ut apud te monitis & exhortationibus diligenter insistat quòd eidem Archiepiscopo possessiones subtractas sine dilatione & difficultate restituas universas, & de proventibus inde perceptis & damnis illatis satisfacias competenter. Ita quòd si ipse aliquid serenitatis regiæ teneret exolvere, tibi cum integritate persolvat. nisi forsan quod tibi debebatur, de ipsius proventibus à te vel aliis tuo nomine sit perceptum. Datum Laterani IV. Kal. Maij.

*Scriptum est super hoc Rothomagensi Archiepiscopo & Abbati de Persagnia ferè in eundem modum ut supra usque in finem, & hoc plus.* Volumus autem nihilominus & mandamus ut literas nostras, quas eidem Regi pro dicto Archiepiscopo destinamus, ipsi præsentetis, & responsum ejus curetis dicto Cardinali per vos vel per literas vestras plenius intimare. Quòd si ambo &c. alter &c. Datum ut supra.

Epist. 18.

R. ANGLIÆ REGI ILLUSTR.

**A**postolica sedes &c. usque in finem, & hoc plus. Alioquin cum serenitatem tuam super hoc semel & iterum & rogaverimus efficaciter & monuerimus diligenter, etsi molestius nobis quam tibi futurum existat, si te occasione qualibet molestem, quia tamen à prædicto tuæ serenitatis consilio declinare nec volumus nec debemus, ne culpa tua nobis & in præsentem ad detractionem & in futuro imputetur ad poenam, eidem Cardinali dedimus in mandatis ut magnificentiam tuam ad hoc per interdictum totius Eboracensis provinciæ appellatione remota compellat. Et si nec sic infra tempus quod idem Legatus tibi statuerit, effe-

Epist. 19.  
De eodem argumento.